

TE HEHEURAA API

I Neia I Te Piha Neneiraa A Te Ekalesia A Iesu Mesia I Te
Feia Mo'a No Te Mau Mahana Hopea Nei, I Papeete,
Tahiti, I Te Mau Fenua Sotaiete, I Te Mau
Ava'e Atoa.

Te hoo: EPiti Toata i te Matahiti.

Nu. 13

Tenuare 1935

Mat. 29

*Te tanu, e te faarari-pape ra hoê â ia: e rave te tahi e
te tahi i ta'na iho utua e au i ta'na ihora ohipa. Korinetia
1 3 9.*

Te Matahiti Apî.

E te mau hoa no te Heheuraa Apî, ia ora na outou
atoa i teie nei Matahiti Apî. Ua tae faahou mai tatou i te
hopea o te tahi matahiti, te mau mea ta tatou i paran e te
mau mea ta tatou i rave, ua oti ia i te papai hia te reira mau
mea i roto i to tatou buka ora, e ua opanihia taua buka ra,
eita e tia ia tatou ia horoi i te hoê mea tei papaihia i roto, e
aore ra e papai faahou i te tahi mea, no te mea ua tapirihia
taua buka ra. Ia feruri rii tatou i nia i te mau mea tei pa-
pai hia i roto i to tatou buka ora, eaha ta tatou? ua mau-
ruuru anei tatou i te mau mea tei papaihia e aore ra aita?
Ua haama anei tatou i te mea e, aita tatou i aroha atu e i
tauturu atu i to tatou taata tupu i te taima tei roto oia i te
ati? Ua parau atu anei tatou na roto i te riri i te hoê mau
parau ino? Ua faaite anei tatou i to tatou maururuuru i te

Atua no te mau haamaitai raa ta'na i horoa mai ia tatou i te mau mahana atoa?

Ahiri aita tatou i ite i teie mau mea huru hape i te papairaahia i roto i to tatou buka ora, ua tiama ia tatou i mua i te aro o to tatou Atua. E mai te mea ua iteahia te tahi mau hapehape i roto, a tamata tatou, i roto i teie matahiti apî, ia papai i roto i to tatou buka apî no te matahiti 1935 te mau ohipa maitai ana'e, e ia tae tatou i te hopea o teie matahiti apî, eita e iteahia te hoê mea i roto, o te faatupu i te haama i roto i to tatou aau.

Aita e tia ia tatou ia tai'o i te mau haamaitairaa tei horoa hia mai na tatou i roto i teie matahiti tei mairi a'enei. Te rahiraa o te mau Fenua tei roto ratou i te peapea e te farii nei to ratou mau taata i te mau huru ati atoa, o tatou nei ra, no te mau fenua Moana nei, te parahi nei tatou ma te han e te peapea ore, te mau huru maa maitai te vai nei, aita tatou i roohia i te toetoe e te ma'i. Te mau mea maitatai atoa no te moana, te reva e te fenua, ua horoa hia mai na tatou. A farii tatou i te reira ma te mauruuru rahi. A haamana'o tatou i to tatou Atua i te mau mahana atoa i roto i teie matahiti apî, ia vai noa teie mau haamaitairaa i nia ia tatou. A faarii tatou i te mau taata'toa ei hoa no tatou, no te mea e tamarii ratou na te Atua, eiaha tatou e faaino atu i te hoê, e vî te mau mea atoa i roto i teie nei ao na roto i te aroha.

Papaihia e Leroi Marori.

“Te Bibilia”

Te na o mai te tahi haapiiraa na to ie ao nei, “Tei roto i te Bibilia te mau parau atoa a te Atua i horoahia i te taata nei. E ua riro taua parau ana’e ra ei aratai i horoahia mai e te Atua na te taata nei.”

A hi’o tatou na mua eaha ia te auraa o te parau “Bibilia”? Teie ia to’na auraa, oia hoi te amuiraa o te mau buka. Oia hoi ua papaihia te hoê buka e te hoê taata e te tahi buka e te tahi taata, e ua amuihia taua mau buka ra e ûa parauhia ratou “Te Bibilia”.

E teie nei a hi’o tatou, tei roto te Bibilia anei te mau parau atoa a te Atua? Te na o maira te pahonoraa, aita roa: Te vai nei te mau parau i roto i te Bibilia o te faaite mai ia tatou i te mau i’oa o te tahi buka area ra te i’oa ana’e tei papaihia i roto i te Bibilia. Te parau a te Atua i papaihia i roto i taua mau buka ra ua moe ia. A hi’o (Exo. 24:4, 7; Num. 2:14; I Kor. 5:9.) e te vai noa ra te rahi ra, oia ia, hoê ahuru e ma vau i’oa i papaihia i roto i te Bibilia, area ra te io’a ana’e ra tei faaite hia. No reira e homa, te reira te hoê tumu rahi aore roa e nehenehe ia parau, “tei roto i te Bibilia te mau parau atoa a Te Atua”.

Ua haapii mai anei te Mesia, tei roto i te Bibilia te mau parau atoa a te Atua, e ua riro taua parau ra ana’e anei ei aratai na te taata nei? Aita roa. Ua haapii mai te Mesia, e ora te taata i te mau parau atoa a te Atua, e ua haapii atoa mai oia, “na te Varua Maitai e aratai i te taata i te mau parau mau atoa ra”. (Ioa. 16:13) E, na te Varua Maitai hoi e faaite mai i te mau mea ta’na i faaroo, oia hoi te mau parau a te Atua. E na te Varua Maitai e faaite te mau mea e tupu a muri atu. No reira e homa te reira te

HISTORIAN'S OFFICE LIBRARY

The Church of Jesus Christ of Latter-day Saints

13264

tahi tumu rahi aore roa e nehenehe ia parau tei roto i te Bibilia te mau parau atoa a te Atua i horoahia i te taata nei, e e riro taua parau ana'e ra ei aratai na te taata. Ua haapii papu hia e riro te Varua Maitai ei aratai no te taata nei, e e faaite noa mai Oia i te mau parau a te Atua.

E mea tia anei ia parau ua riro te hopea o te Buka i papaihia e Ioane, oia hoi Te Apokalupo, ei hopea no te parau a te Atua? Mai te mea e faaroo tatou tei te Bibilia te mau parau atoa a te Atua, te reira ihoa te hopea o te parau a te Atua. Area ra aore roa e mea tia ia faaroo mai te reira no te mea e, te vai noa nei te mau parau tei faaite mai ia tatou e heheu noa mai te Atua i ta'na mau parau i te taata nei. (Amo. 3:7; Apo. 14:6; Ohipa 2:17, 18; Ioa. 16:13-14.)

No reira e homa ia faaroo tatou mai tei faaite hia i roto i te mau parau faaroo no Te Ekalesia a Iesu Mesia i te Feia Mo'a i te Mau Mahana Hopea Nei, oia hoi "Te faaroo nei matou i te mau parau i heheuhia mai e te Atua i mutaaia hora, e te mau parau ta'na i heheu mai i teie nei, e te faaroo nei matou e, e riro a oia i te heheu mai i te hoê a mau parau maitai e te faufaa rahi i to'na ra basileia".

Papaihia e Ioane.

No Te Feia I Pohe.

Ua hau anei te maitai o te mau taata e ora nei, i to te mau taata i pohe a'enei — i te imiraa i te mau ravea ia ora to ratou mau varua.

Ua rahi anei te mau haamaitairaa tei noaa i te mau taata e ora nei, i teie nei, i te toea o te mau taata tei pohe

a'enei, no te mea i te oraraa o taua mau taata ra aita te Eavancia mau i nia i te fenua nei?

Eaha te vahi huru ê i rotopu i ta outou mau ravea no te imiraa i te ora i te mau ravea a to outou mau tupuna?

E mea papu e, e mana'o te mau taata atoa o tei faaroo e, e Atua parau tia te Atua e te ore e hi'o i te huru o te taata, e aroha oia i ta'na mau tamarii atoa, e eita te hoê varua e huru ê i mua i to'na mata ia tae i te hora poheraa o te taata nei.

Ua parau atoa oia e, E ere hoi oia i te Atua no tei pohe, no tei ora ana'e ra hoi ratou atoa ia'na. (*Luka 20:38.*)

Na roto i ta'na Tamaiti Fanau Tahī ua faatae oia i te parau no te ora, eiaha i te feia ora ana'e i te feia atoa ra. Tāua parau ra o te Evanelia ia ta te Faaora i afai iho i te mau varua o te mau taata o tei ora a'enei i nia i teie nei ao e tei pohe roa e o tei vai i roto i te vahi tapearaa o te mau varua—e e mau mea ora ana'e ratou e te ite hoi o tei tia i noa i te ora ta'na i afai atu no ratou. (*I Petero 3:18-20; Luka 4:18.*)

Ua horoahia mai tana ora ra, no te feia i pohe, e te Mesia, i taua Evanelia ra ta'na i haapii atu i te mau taata tei parahi i te hiti o te roto i Galilea ra, no te mea, hoê noa iho ta'na ravea, hoê hoi Evanelia (*Galatia 1:8-9*) e e tia roa ia faatanohia taua Evanelia ra no te feia i pohe ra e tei ora atoa hoi, no te mea te ora nei te taatoa i roto ia'na.

Te haapaoraa i te mau ture atoa o te Evanelia e ere ia i te farii noa raa, i roto i te mana'o noa i ta'na mau haapii-raa, no te feia i pohe e tei ora atoa hoi. Hoê ana'e ta'na mau ravea faaora no te mau taata atoa, no te mea e Atua parau tia oia e eita oia e horoa i te hoê maitai i te hoê a'e taata tei ore i horoahia e ana i te taatoa o te mau taata.

Eaha iā taua mau ture te tia ia tatou ia haapao ia noaa mai te ora?

Teie te pahonuraa:

1. Faaroo i te Atua te Metua mure ore, i ta'na Tamaiti ia Jesu Mesia e i te Varua Maitai hoi.

2. Te Tatarahaparaa i te mau hara atoa e te faaapîraa o to tatou oraraa ia faito i to te Mesia.

3. Te Bapetizoraa i raro i te pape no te haamatararaa i te mau hara, i raro a'e i te rima o hoê tavini mau a te Atua.

4. Te tuuraa o te rima no te horoaraa i te Varua Maitai.

5. Te hâapaoraa i te mau ture e te mau faaueraa no te Evanelia.

Ia tai'o tatou i teie mau parau i nia nei, e mana'o paha tatou e, ua hau a'e te maitai tei horoahia, i te mau feia e ora nei i nia iho i te feia pohe. Parau mau roa e tia roa i te hoê varua tei reva e tei noa ia faaroo e ia tatarahapa, terara nafea te Bapetizoraa i raro i te pape? E te tuuraa o o te rima na te mau Peresibutero o te Ekalesia?

Na roto i to'na aroha e to'na here i ta'na mau tamarii ua faatia to tatou Metua i te hoê ravea ia bapetizo hia, te feia i pohe ra, i te pape e te varua. Ua faatia ta'na opuaraa, ia bapetizohia tatou, te feia e ora nei, no te feia i pohe i roto i te mau vahi i faataahia no te raveraa i taua ohipa maitai ra. E ia na reira hia, ua ravehia te ohipa no te feia i pohe.

Eaha e faarii mau anei te feia i pohe ra i te maitai? Ua haapao te Atua i ta'na tufaa na roto i to'na faatiaraa i te ravea, area ia ore tatou, te feia e ora nei, e haapao i taua ravea ra, e maitai anei tei pohe ra?

“Mai te mea te vai tahaa noa ra te hoê ra taeae e aore râ te hoê tuahine, e aore ra tei ere i te maa, e parau anei te hoê o outou, a haere ma te hau, ia nahanaha e ia paia oe, noa'tu e aita oia i horoa noa'e i te hoê mea tei au no to'na tino, eaha, o vai ia tei maitai i reira?

A feruri na tatou e, mai te mea ua pohe to tatou mau tupuna ma te ite ore i te Evanelia, e te vai nei, ia tatou nei, te hoê ravea no ta faataeraa'tu ia ratou te mau maitai no te Evanelia e aita tatou i haapao i taua ravea ra, eaha tura ia te faufaa e noaa i to tatou mau tupuna. E vai noa ia ratou ma te ere i te mau haamaitairaa e eita roa ratou e tae i te vahi maitai.

Te vai nei te hoê ohipa rahi i nia i te feia e ora nei no to ratou mau feia i pohe, oia hoi, ua vaiihohia tatou ei haapao no te ora no to tatou mau fetii i pohe. E tae oioi ratou i to ratou vahi faaearaa mai te mea e haapao oioi tatou, no ratou, te mau ravea tei haapao atea hia, e te Atua, na roto i to'na here i ta'na mau tamarii.

E ohipa te reira tei horoahia mai ia tatou nei e eita e tia ia tatou ia horo i mua i te reira. Ua titauhia i te taatoa o te taata—tei parahi i te mau vahi teitei o te ao nei e to tei haehaa, ia rave i taua ohipa ra. E mau tupuna ana'e to tatou atoa tei pohe a'enei, e e tamarii ana'e ratou na te Atua, e te vai ra to ratou tiaraa i roto i te ora tei horoahia mai e te Atua.

I roto i to'na faataaraa i te rahiraa no taua ohipa ra, ua na ô mai te Peropheta ra o Iosepha Semita: “Te ohipa rahi a'e ta te Atua i vaiiho mai i roto i te ao nei o te imiraa ia i te mau ravea no te feia i pohe”, e ua faarahi oia i ta'na parau a ua ô mai ai oia ra: O te Feia Mo'a te faatau i te rave i te ohipa no to'na mau feia i pohe ra, e riro paha oia i te ere i to'na iho oraraa.

Papaihia e Marcel Bonnet.

Te Hiero.

E mea tia ia vai i roto i te mana'o o te taata nei te ite no to'na huru mau, e nohea mai hoi oia e e haere tia to'na varua ihea. E ia pohe to'na tino repo nei, e eaha hoi to'na huru ia tia-faahou mai oia. Ia ore te taata i ite i to'na huru mau mai tei, uihia i roto i teie nei mau uiraa i nia nei ra, e riro ia ei mea fifi ia'na i te haapao ohie i te mau ture e te mau faaueraa a te Evanelia. No reira te hinaarohia nei ia haapii pinepine hia to te taata huru mau mai to'na hamaniiraahia ei varua e tae noa e a muri noa'tu. E taua huru haapiiraa ra ua haapiihia ia i roto i to tatou mau hiero ia ore e moe ohie i te taata nei i te ite i taua mau mea nei, oia hoi, ua riro te mau hiero ei pu vai-maitai-roa no te parau mo'a o tei riro ei faufaa rahi no te Evanelia. No reira, te haere pinepine nei te mau melo i te hiero ei faaaraararaa i to ratou mau mana'o i nia i te tumu o to ratou vairaa i roto i teie nei ao. Ua noaa te maramarama rahi na roto i te mau horoaraa i horoahia mai i te mau melo tei tae i roto i te hiero.

Te haamaramarama mai nei taua mau horoaraa ra i te huru mau no to tatou oraraa a vai ai to tatou varua i nia i te ra'i, e te haapii atoa mai nei ia i te huru no te hamaniiraa o teie nei ao, e te faaite mai nei hoi i te tuatapapa raa parau o to tatou na metua ra o Adamu raua Eva, e to raua huaai, e te haapii atoa mai nei taua mau horoaraa ra i te huru o te tupuraa o te Evanelia i te mau anotau atoa ra, e te faataa'toa mai nei ia i te auraa mau no te taraehara o te Mesia, ua maramarama hoi te faatia-faahou-raa o te Ekalesia o Iesu Mesia i teie mau mau mahana hopea nei, e te tahi atu â mau haapiiraa e noaa mai na roto i taua mau horoaraa ra, o te ite ia i te mau ravea e noaa mai ai ia tatou te oaoa mau a parahi ai tatou i roto i teie nei ao, e ua taa papu hoi ia tatou te vahi e noaa ai ia tatou i muri a'e i te poheara.

B. F. S. 102:9. Ua tuuhia i roto i taua mau hiero no tatou ra, te mau ravea maramarama rahi i itehia i te feia paari no teie nei ao nei, ei haamaramaramaraa i te mau melo no te Ekalesia i te huru mau o te taata.

E mai te mea e, ia imi outou i roto i te ao taatoa nei, eita ia e iteahia te hoê fare hau a'e i te maitai i to tatou ra mau hiero. I te haamaniraa o taua mau hiero ra, aita ia i hi'ohia te rahiraa o te moni, te vahi râ i titauhia no te patu-raa i taua mau hiero ra te roaa raa ia o te mau ravea hau roa i te paari, e inaha, ua manuia taua vahi ra. E ua manuia hoi no te mea e, na te Atua i horoa mai te maramarama, e aore te hoê ohipa a te Atua i hape i te hoê vahi iti a'e.

Ahiri aita te Atua i horoa mai teie nei mau ravea ei haamaramarama ia tatou nei, ua ati ia ta'na mau tamarii i te poiri no te ite ore i ta te Atua i hinaaro.

Te oroa rahi hanahana roa i ravehia i roto i to tatou mau hiero, o te faaipoiporaa ia i te pae varua. E taua faaipoiporaa ra, ua riro ia ei titi-roa o te tane i te vahine, ei titi-roa o te vahine i te tane e a muri noa'tu. E i muri a'e i te faaipoiporaa i te pae varua e faatitirohia'i te mau tamarii i to ratou mau metua i faaipoipohia ra, mai tei faaitehia e Malaki i te pene 4 irava 5, 6, a ua ô mai ai oia. "Inaha, e tono na vau i te peropheta ra ia Elia ia outou na, a tae atu ai i taua mahana rahi mata'u o Iehova ra, ia faafariu oia i te aau o te mau metua i te tamarii, e te aau o te tamarii i to ratou mau metua, o te haere mai hoi au, e o te tairi i te fenua nei i te ino."

Hoê noa iho taata i roto i teie nei ao i haamanahia no te raveraa i teie nei oroa hanahana no te faaipoiporaa i te pae varua, e taua taata ra, o te Peresideni ia o te Ekalesia, e tia râ i te Peresideni ia haamana ia vetahi ê ei tauturu ia'na no te hoê taima poto i te raveraa i taua ohipa faaipoiporaa ra.

E TUATIHIA TEIE NEI PARAU.

Na te Heheuraa APÎ. Ia ora na?

TE FAAITE ATU NEI AU I TE PARAU RII API
NO TE HARU RAA "RE" I FAKARAVA.

I. "Te pupu pû"; a te Ekalesia Momoni, tei afa'i hia a'e nei i Fakarava, Te pupu pû i parau hia ra e, "O Tamarîi te Maoa'e o na Oio tua rehu, e rehu ana i te ata toa, Te rehu maira i te ata Toerau". E ua roaa ta ratou "re" hoê hanere farane ta ratou moni.

II. "Te pupu tu'e popo". Ua afai hia i te haru raa "re" Te pupu tu'e popo, i parau hia ra e, "O te ui Apî". E ua noaa ta ratou "re" hoê hanere farane.

III. "Te pupu himene". Ua afai hia te pupu himene i te hi'o raa "re". E ua noaa ta ratou "re". E pae ahuru farane te moni i noaa. Ia faaroo oe i to'na ta'i, E vare'a hia oe". E te vai atura te tahi mau "re" â na ratou. "E mea au atoa hoi.

Papaihia e Toae a Maire.

TE MAU PARAU API

Parau rii Apî.

I te 5 no Titema ua tae mai te parau niuniu ia Muria raua o Leroi, o te faaite mai ia raua e, na pohê te metua tane o Muria i te 3 no Titema, na te Peropheta o Hepera Taranata i taniuniu mai. E ati rahi roa teie no Muria, no te mea i te taime ia'na i faarue i to ratou fenua, e mea maitai roa to'na na Metua. No reira a tauturu tatou ia'na i roto i teie ati rahi, na roto i to tatou pure, mai te ani atu i to tatou Fatu ia tauturu mai ia'na ia haamaitai ia'na e ia tia ia'na ia faaoti i ta'na ohipa i teie mau fenua nei.

Orometua Apî.

I te 3 no Noema ua tae mai e toopiti Orometua apî i Tahiti nei. O Toma raua Iosepha to raua ăa io'a. Ua maururu tatou ăa faarii mai ăa raua i rotopu ăa tatou ăa tauturu ăa tatou i roto i te ohipa a te Fatu.

E nână eia haru.

I te avae Novema i mairi a'nei; a tere ai te pahi ra o Kaho mai Shanghai e tae atu i Swaton ua haru hia oia e te tahi nână eia haru e ua faatere hia oia i Sami Point e i reira ua huri hia te mau taihaa atoa i uta e ua tapea atoahia e 3 taata no te titauroa'tu i te moni. I mairi a'e ua tuuhia te pahi e ua faatere hia oia, e to'na raatira i Swaton.

E parau maitai.

Ua faaitchia i roto i te ve'a no te hau Farani no Oteania nei, no te 1 no Titema 1934, e aufauhia i te mau feia faaapu no teie mau fenua moana nei, i te moni ra e 90 farane, oia hoi e 18 tara moni farani, i nia i te tane puha tei hoochia e ratou, mai te ava'e Tiurai i te ma. 1933 e tae roa mai i te hopea no te ava'e Tiurai 1934.

Na te hau teie moni e aufau no te tautururaa i te mau feia faaapu no teie paeau fenua moana.-- E tauturu raa rahi teie, e ere anei?

Ua nounou rii i te moni.

I te oire ra i New York. America, ua pohe a'enei te hoê ruau vahine, o Louisa Herle, e 74 to'na matahiti, i roto i to'na piha tei vai i raro a'e i te hoê fare rahi, e piha repo roa e te hairiiri. I muri a'e i to'na poheraa, ua faaitchia, eto'na taata haapao faufaa, te vaira ta'na moni rahi oia hoi e 1.500. 000 tara moni America i roto i te mau fare moni. No to'na nounou ua faaea noa oia e 18 matahiti i roto i te veve e te hupehupe.

E ati rahi.

I te 2 no Novema i mairi a'enei, ua tupu te hoê ati matai i te fenua Anam, tufa fenua Farani, e no te puai o te matai ua parari e 5000 fare e ua pohe e 300 taata.

Ua fanau rii.

E 7 ava'e i mairi a'enei, ua fanau te hoê vahine, o Mme Diome, no te tufaa fenua Canada, e pae tamarii tamahine, e i teie nei ra te parau nei te taote tei haafanau ia ratou e e mea maitai roa ratou. E ere anei i te mea maere?

Ua pohe roa.

I roto i te hoê ve'a no te 2 no Novema i mairi a'enei, no Pari ua faaithehia e, ua pohe roa te Baron Edmond de Rothschild i te 89 o to'na matahiti. O te hoê oia no rotopu i te hoê opu taata tei rave ana'e i te ohipa hoo moni, e na roto i taua ohipa ra ua riro oia ei taata moni roa.

Ua haapohe ia'na iho.

Te faaithehia nei i roto i te hoê ve'a no te 19 no Novema 1934 no Tokio, Japon, ua tapu te taata ra o Honda i to'na arapoa, no te haapohe ia'na. Te tumu oia i na reira'i, no te mea ua hape oia i te aratairaa i to'na Arii i te hoê haapiiraa ta'na e haere ra e hi'opoa. Te faaithe atoahia nei e, te tiaturi nei te mau taata Japone e, o te ravea ana'e te reira no te faaorerana i te hape i ravehia i nia i to ratou Arii.

Ua maitihia.

I roto i te hoê ve'a no te 10 no Novema 1934 i mairi a'enei ua faaithehia mai e, ua maitihia to tatou taeae i te faaroo, o Marriner S. Eccles e te feia faatere hau i America ei taata faatere no te pupu taata faatere no te mau fare moni o te Hau i America. E faaiteraa te reira e, e taata ite mau oia.

LOUIS DROLLET Gérant

L. R. MALLORY Imprimeur.

Rue Dumont d'Urville, Orovini, Papeete, Tahiti.